

四庫全書

集部

欽定四庫全書

集部

山齋文集卷一至四

詳校官監察御史臣龔駿文

中書臣劉源溥覆勘

總校官知縣臣楊懋珩

校對官中書臣葉蘭

謄錄監生臣馮蓋

欽定四庫全書

集部六

山齋文集

別集類五

明

提要

臣等謹案山齋文集二十四卷明鄭岳撰岳字汝華號山齋莆田人弘治癸丑進士官至兵部右侍郎岳素著風節官江西按察使時首折宸濠逆謀反為所誣構逮問及官兵部復以議興獻祔廟忤旨力請致仕後議禮諸臣

皆蒙追恤賜謚而獨不及岳蓋孤介寡援其
天性然也柯維騏續莆陽志稱其所作詩文
俱暢達蘊藉而謝山子亦稱其詩深於諷諭
之體所著有蒙難錄西行紀南還錄山齋吟
稿漫稿淨稿續稿奏議因雕本燹燬所存不
過數種是集乃萬厯間其曾孫炫蒐輯重鈔
詩七卷文共十七卷謂較舊集十未能存二
三今觀所作當信陽北地初起之時文格未

變猶恪守茶陵之矩度雖條暢有餘竒麗不足而質實平易不染塗飾鉤棘之偽體固宜以其人存之者矣乾隆四十五年二月恭校上

總纂官臣紀昀臣陸錫熊臣孫士毅

總校官臣陸費墀

欽定四庫全書

山齋文集卷一

明 鄭岳 撰

五言古詩

立春和林見素韻

人生百歲期在苒十踰四春陽布德新花鳥各自媚鬢
髮日以種歡悰與昔異寢食淡無營網緼護元氣朝雨
洗春痕南山已堆翠幽勝愜素期糾紛傷往事所貴一

身存儻來物皆寄破屋城南隈百需無一備雲莊結比鄰時往佳章遺諷詠激微衷懷哉邈高致

秋齋為周彥通侍御題

午夢忽驚覺呼童開竹扉借問客為誰青驄束金羈手持卷一握錯落瓊琚詞展玩重太息遐心將在茲二氣互翕張真宰執玄機物盛不可過斂舒各以時露凝天宇淨樹變郊原稀芝蘭抱孤芳鷹隼奮高飛齋居感深念流光倏如馳及時當自勵毋令華髮滋

后峰篇贈黃伯固正郎

九峰何崔嵬屹然鎮坤維泉石挹明秀草木含華滋最
後有奇峰退讓乃卑卑謙光豈容掩靈淑良在茲高文
合典則懿行無瑕疵歷宦十餘年既罷將安歸悠然念
出處戒途仍迂避經營四方志况當強壯時去去濟時
艱終豈好爵縻山中精舍在歲晏期相依

送何子元少宰改任南都

夏秋多靈雨沈陰翳晨光積潦斷衢塗欲濟苦無梁送

子出城闈策馬登前岡回颺激流雲顛氣變清商憑高
一舒睇天宇何茫茫感茲物候異鬱鬱情內傷古稱楚
多才弱冠已擅場博學富文藻節操誠慨慷茲行豈徒
然抗言繫綱常南望鍾山遙白雲懷帝鄉風露日夕清
蘭桂發幽芳與子結綢繆望望不得將平生契分深白
首相激昂浮榮難久恃萬世一何長願言保終節青簡
諒毋忘

幽居公署書懷

處憂患能以義命
自安詩見之矣

寧庶人宸濠久蓄異志予由臬轉藩裁抑逆
萌濠不能堪陰嗾同寮橫加誣訐威賂上下
文致其辜逮繫踰年始得罷歸憂患中嘗作
蒙難錄茲摘其槩書之

咄咄日書空禍階慨伊始蟻穴昔何微潰川浩無涘數
至諒難違修身以順俟明夷古所悲演易在羸里厲貞
乃終吉齋心悟玄理

其二

谿壑絕險巖千仞猶可窮人心如其面談笑伏兵戎田
灌平生交杯酒不容魏其力解紛乃并遭禍凶往事
昧明訓邈哉廉藺蹤鷓蚌久相持漁人並收功

其三

平生相傾慕會合意何敦相期振頽靡撫心憫元元如
何自猜忌枝葉傷同根川洛構黨禍善類鮮安存王導
仇伯仁千載抱煩冤古來同嘆息棄置復何言

其四

鴉鳥棲前楹啞啞動哀鳴須臾雙鵲呼下上如有營既
憂還復喜徒亂羈旅情毀譽隨愛憎吉凶竟難憑賸賸
絕聰聽冥心游太清

美女篇

此篇以美女自
况讀之悲惋

美女出瓊閨姿容皎白皙婉孌當盛時丹鉛去華飾豈
徒誇靡曼禮度謹修飭少從柯斧言與君結良匹纖手
敢自愛辛勤事家室烹飪奉賓祭機杼務組織雞鳴起
盥漱昏暮未遑息始時君家貧數歲頗儲積將諧百歲

歡一朝遭譴斥萋斐成貝錦青蠅間白璧貞性豈善媼
蛾眉生妬嫉懊惱難自明撫床時掩泣族里為咨嗟姑
璋誰顧惜娉婷將奚歸皓首不更適祝髮習道經焚香
誦晨夕天心如有感庶幾終察識

遊俠篇

此篇意以宸濠比吳王
漕其事米驗亦詩識也

戰國貴公子孟嘗最稱賢食祿儻萬乘養士滿三千雞
鳴與狗盜生死同周旋信誓重然諾服御鬪芳妍一言
偶合意不惜千金捐後宮出綺麗歌舞醉華筵晝夜務

經營力折王公權
殺人報眦眦道路不敢言
頽風一以開
延蔓彌八埏
漢網方踈濶
吞舟漏重淵
吳淟招死士
密置淆澗間
豈知真將軍
輕車出藍田
逆節竟鑽芥
明鑿垂簡編

復回省城待報幽中書懷

重門晝深局蔓草
沒行跡
舊侶何寥寥
危途轉相逼
計功獲深酬
踰躑圖遠適
詘辱甘予愚
誰為世道惜

其二

一氣播洪鈞萬物各有適予生亦豈徒知命奚感感軒
冤儻來物去去無復惜抗志本不高末路嗟跼蹐從今
謝樊籠遙空振六翮

其三

社櫟辭剪伐蘭膏坐銷鎔巧拙各有宜所貴保初終緬
懷見素翁進退何從容盛名難久居林壑寄幽蹤幸茲
返初服雲岑老相從

林竹田司空自予蒙難屢為救解茲過洪都挈

予妻子同歸感而有作

司空並鄉國弱歲挹光儀意義重相許肝膽不復疑名
位日以崇詎肯忘賤微臨難力相拯千里歸厚遺縈紆
枉川陸為我解纒羈舉家脫虎口相將返柴扉深衷懷
感激不覺涕交頤時情轉盼異古道誰復持祁奚免叔
向豈為平生私高情激千古流俗安足希

九江阻風泊舟有感

白浪起層層峰頭雲正黑迴舟入小港聊茲一憩息路

梗難為期滄波浩無極坐觀北來船帆掛千仞直篙工
意閒暇津津動顏色緬懷造化心施予難為力往船風
宜南來船風宜北南北本異途彼此那俱得物理每循
環明朝未可測隱几澹無營冥心悟義易

過水口

建溪昔稱險橫流多怪石參錯列牛馬廉利侔劍戟篙
工慣習水禱賽資神力前後互招呼分寸恐或失激盪
轟雷鳴沫流飛雪白諦觀毛髮豎一命試輕擲逶迤過

水口灘盡溪流碧棹歌發清響貫酒娛西夕患至慮煩
紆險過事愉懌物理固其然臨流長太息

送吳伯貞還漳

青陽布時序游子戒晨裝崎嶇越鄉郡迤邐登我堂感
舊一揮涕相視鬢逾蒼念昔縈微祿相遇天一方風濤
起奄忽章水鯨鯢揚削地誅晁錯繫獄悲鄒陽戢羽還
故棲仰視天茫茫昏靈一朝解日月回精光天人盡紆
憤豈伊私願償子獨秉高義意氣相激昂涓辰集朋舊

壺榼宴山莊人生適意耳此會安可常冥鴻謝矰繳去
去天路長

題頤晦亭

結屋城東隅縈紆遞幽境亭榭鬱以深竹石秀而整好
鳥鳴春烟芳池湛秋影爐熏對書榻端坐思欲瞑虛室
畫生白真機時悟領渾涵謝圭角文字何雋永匡時豈
無術素尚事幽屏際世幸黃唐獨茲慕箕頴

上清宮修造

江國歲仍饑處處盜尤劇閭里鮮聊生况茲興鉅役土
木極工麗輝煌耀金碧各務出新智規恢過疇昔內帑
不惜費列郡捐餘積畚鍤役萬人筋力誰顧惜所祀何
代鬼杳幻難具識漢季有張陵五斗米中賊干戈幸通
誅遺種復滋息竊據山水勝蔓延徧區域崇奉日轉加
勢與闕里逼大道久晦冥爍火何時熄

嘉靖二年六月十九日予使事西行夕宿良鄉

晨赴涿州即事

商飈應時序溽暑倏云徂微涼襲衣襟病骨覺已蘇宵
短不遑寐晨興赴前途前途紛交馳縣道直皇都民勞
困征徭蔽體無完裾所幸秋稼豐維黍復維稌淫雨不
為災旬月當得舖

過函關

建都據形勝自昔稱關中我今歷峭函險絕凌蒼穹一
夫當關守百夫不敢攻秦皇藉餘烈諸侯俱景從漢高
既滅項高拱洛陽宮婁敬脫輓輅一語回天衷即日幸

車駕定鼎垂無窮
決機振長策
識度誠豪雄

發陝城

長安古都會
弭節暫盤桓
羣公日惠顧
樽俎接清歡
如何別此去
遙遙赴臯蘭
維時秋已分
日夕風露寒
清霜肅原野
草樹漸摧殘
玄蟬噤其聲
蟋蟀鳴夜闌
客子感時序
悽然懷永嘆
迴望雙闕遙
迢遞層漢間
清光勞夢寐
行役何時還

馬嵬之南數百武
為逆璫劉瑾故宅
噫楊妃以

此地沒而瑾復以此地生豈事有適然歟均足示戒

明皇西幸蜀嵬坡駐鑿旂六軍不肯發宛轉縊蛾眉悠
悠百世下撫跡空嗟咨妖氛豈未散閹豎復生茲懷奸
竊大柄國勢欲潛移事頗天寶類幸爾亟誅夷羣奸起
嗣虐四海成瘡痍亂階鑿婦寺永垂萬世規

秣陵歲暮

閒居近十載風土樂餘生兒曹驩節至歲事多經營如

何從遠役遙遙赴神京
旅遊已厭歷況欲競浮榮
自昔際遇難幸茲世運亨
草澤訪耆彥拔茅以彙征
負暄安足獻食芹豈忘情
冲抱徒區區蹇拙竟奚成

潞河舟中

潞水何悠悠日夜東南流
東流幾時還到海始云休
物性固有然人心亦奚求
所求諒非遠庶以道自修
憶昔罹橫灾十載卧林丘
自分亦已矣雲水結綢繆
聖皇訪遺耇樗散謬見收
省寺屢遷秩愧莫展良猷
兢兢循素

節庶以效前修萋斐一朝起竟莫詰其由輿論皦日星
拊躬本無尤心跡幸已白名位馬足留讒言變白黑世
道良足憂

謁闕里途中即事十一韻

遲遲待明發肅肅戒行輶郊原俯阡陌道途廣且修朝
雲結層陰雨澤尚滯流鬱蒸氣未解風露何當秋役夫
苦流汗吾行豈漫遊壯齒走四方老至行且休睽茲毓
聖鄉欲詣竟無繇於茲不修謁終身抱悔尤迢遞展慙

懃闕里暫綢繆秋陽方皜皜緬邈仰風猷倦息杏壇陰
渴飲泗水流

塞下曲四首

邊郡良家子結髮即從軍彎弓射邊月揮戈開塞雲黃
河十月冰敵騎日成羣突來犯我壘決戰死生分冒危
殺首賊不得敘階勲

邊人慣騎射奄忽若星馳朔風吹馬來四面衝我師我
師莫輕動持滿以待之佯北勿輕追恐為敵所欺

漢皇開五郡本為制匈奴士馬日南侵發卒守邊隅主帥多刻剝軍吏恣徵需一食尚不飽安能執戈艾儻無內顧憂安敢愛微軀

豪酋相讐殺奔潰入西蕃西蕃不能制被驅若孤豚番夷勢漸合種類日益繁長驅向洮岷千里沙塵昏我兵既寡弱剪滅何敢論

隗囂

新都滅炎精四海方悲嘆隗囂起秦隴借名圖復漢豪

傑多景從生民懼塗炭南陽帝業新羣雄俱解散西州
獨阻險偃蹇成僭叛么麼不自量神器豈容濫伏波始
識真東廡白幘岸聚米導先驅倉黃西域竄何不效竇
融歸朝膺顯宦

度關山

昔聞關山險今作關山行登危復盤曲十步始一平秋
潦混泥途崖石亂縱橫仄徑俯頽坡僕馬度凌兢薄暮
至絕巔天地劃開明飄風吹暝色凜然寒氣凝慨念茲

川嶽設險輔秦京時危資竊據歷代紛戰爭昌時久混
一六合且休兵憑高一舒嘯緬懷千載情

內丘憫旱

內丘數十里磽确環高原十旬不得雨四野沙塵昏黍
粟焦且死艱食憫元元官柳摧為薪煮葉充晨飧老稚
出趨食破屋棄荒村公庾素乏儲富室徒勸分鮒魚得
斗水猶幸性命存安得沛甘澤萬物回枯根

蘭州以山名北枕黃河城之西有唐帽山尤秀

特彭司馬幸庵先塋在馬地靈人傑堪與家之
說豈盡誣邪

南望臯蘭山北枕大河流山勢相蜿蜒河流去不休華
夷界南北關陝扼襟喉中有唐帽山高壠鬱松楸靈氣
鍾之人元老克壯猶邊事久經畧樽俎運深籌

真定會劉南坦中丞以詩卷託和

侵晨即長途亭午臨古縣赤日炙肌體黃埃污顏面神
昏思伏枕臂弱強持扇密柳方連陰涼颺時一薦披襟

為輸寫暫憩忘饑倦鄉思亂飛雲宦情牽弱線朝廷重
綱紀邊鄙懼禍變行役敢辭勞縱觀殊未厭中原多古
蹟垂老幸一見西行抵關塞閱歷行當遍

舟中阻風

潞河晨解纜即欲抵河西詎為風所阻竟日蟠淺泥暑
雨久浸淫四望長蒿藜荒村破茅屋日午不聞雞泊舟
此非處日晚風更淒憂心倏如愒孰能究端倪天道易
反覆人事常不齊

覺衰

今年頓覺衰不謂病忽至早春解散裘酸痛傷左臂伸
縮自弗堪拘攣重為累血少失養筋風冷潛入骹藥餌
殊罔功針灸亦弗利白髮倩人梳衣帶不自締況能彎
駢弓何由拔赤幟歲月去鮮歡世事老無味衡門歸養
疴稽首深拜賜

梅峰小隱奉招會友

丁亥之冬林翁孚可汝儀時獻吳翁約中結

為社會予僭為首倡會于梅峰其次年宋翁
良翰林翁以永皆預焉

香山與洛濱結社獨名世齒德相推致名位豈暇計標
望重一時文采照來裔吾儕跡世途投老脫羈繫丘園
多暇日高蹤良足繼俯仰愧前修欲舉旋復替友臬亦
何為超忽遠行詣人事嘆多忤天機竊難契及時且為
歡荏苒歲將逝籬菊寒始花幽香雜蘭桂眷茲舉一觴
梅峰掃荒翳真率循前規山堂登瑣細詰朝幸早臨焚

香侯興隸

秋日偕社友遊溪聲閣

凌晨出南郭悠悠衢路長
褰襟臨迥野迴颺遞微涼
蒸鬱漸以舒顥氣應清商
農家收稿秸禾稼已登場
幸茲歲頗熟閭閻得小康
凝烟翳林莽鶴雀相翱翔
古來賢達士墟墓列道傍
感茲起遐念人生安可常
涓辰集儔侶迤邐越林岡
梵宇隱寥廓溪聲瀉琳琅
山厨登野藪石鼎炷篆香
談諧淹竟日薄晚雨冥濛
老至惜頽景駒

隙度流光及時恣遊賞毋徒傷慨慷

林都憲翠庭邀遊南山登高隴歷諸名勝有作

城郭風塵滿籃輿遠追尋崎嶇歷田埂轉望鳳山岑
松柏翳原野中有大夫林斂衽肅下拜廉退昔所欽
山川莽回護佳氣鬱以深東岡列僧舍樓閣散清陰
推窓延遠景啜茗滌煩襟拜亭倍虛敞深樹響鳴琴
時平偃兵革禾黍復森森吾儕幸無事及茲盍朋簪
清歡雜嘲笑美酒時共斟歲月豈久待駉驥已駉
駉疇能究緣業且

詣塵外心

和林汝儀招飲溪閣韻

旭日散林霏澄波銜山影離城纔幾許已覺非人境侵
階雨氣潤攪樹風力猛采采園中蔬盈盈水中荇更覓
前溪魚垂竿移舴艋占年慰夙期刺水秧千頃几杖松
壇幽雞犬柴門靜幸逢素心人高談白日永

黃仲陽東洲別業

北郭亘芳阡延矚鬱幽邃木蘭及使華二水於茲會墟

曲藹人烟平疇間溝澮澄潭集漁網沃土供王稅結構
際交流儼與羣峰對閒庭芳草積隙牖蛛絲綴慮澹物
俱忘知寡我為貴茲勝君先得吾駕將馬稅磽确多棄
壤所求亦易遂衡茅成小築徐徐理荒穢來往話桑麻
聊茲閱年歲

鶴峰為蔡君題

考亭昔為吏遺愛流清漳世遠道益孤墜緒何茫茫蔡
君負英資博學知向方少懷四方志預以試一鄉道義

素所敦慕古心如狂龍池卜新居清淑氣攸藏維東有
鶴峰截葉臨吾堂朝夕與之對端冕肅以莊山高猶可
梯且欲凌其岡復翁有遺矩千載何能忘

題黃孝女刲股愈疾卷

儒門白皙女婉孌髮垂眉念父遠行役獨與母相依母
病困牀褥家貧莫致醫嘗聞昔人言股肉乃良劑顧念
此微軀本是母所遺一死尚可捐何惜方寸肌磨刀試
割取肉斷血淋漓一念格彼蒼神物陰護持母疾亦良

金史卷一百一十五
卷一
已族里驚且悲末俗好奇詭昌黎深致譏此女出貞性
於世無所希親疾不嘗藥愧死世間兒

楊烈婦

國子助教楊孟洪子婦

白哲名家女婉婉嫻壺儀二十嫁君家與君相唱隨君
志在青雲偃蹇未得施一朝齋恨歿棄妾忽若遺薄命
喪所天何用此生為九原會相從瞑目甘如飴尊嫜相
慰藉豈不念恩私歲月方悠悠世路亦多歧一死吾事
畢此心良不欺吁嗟烈婦操千載名永垂

湯陰美里文王廟

商辛肆淫虐諸侯多就誅西周秉臣節亦乃遭囚拘憂
思鬱以深默馬悟玄虛義畫闡幽秘至理諒無餘天地
豈不寬臣跡不敢踰日月豈不明君怒或可舒進女事
解脫遷史何其誣

淇縣有殷三仁祠將至衛輝有殷太師比干墓
廟

秋黍何離離驅馬登殷墟孟門與太行左右相縈紆狡

童不我好萬乘為獨夫圖任惟奸回親賢反見疎天心
各自靖揆道豈云殊埋骨邈千年廟貌猶古初孔聖贊
一詞水與天壤俱

安肅南出有劉伶墓碑

鹿車一壺酒荷鍤以自隨云死即為埋曠達不可羈如
何此墟曲有塚高巖巖刻石紀道旁無乃好事為沈酣
棄禮法車服焉得維遭危故有託舉世人莫窺苦節多
湮沒怪爾名獨垂

過楊伯起墓

自知誠不易知人良獨難
薦賢本為公私念安得干暮
夜懷金來相對多醜顏傷哉市道交古意何時還
幽明寧可欺此心炳如丹
千載誦遺言清風墓道寒

題黃時簡臺旌孝廉卷

崇仁除目下朝野咸稱難
澆俗相糾結積蠹穴其間
自昔官於斯鮮能保終完
君少出宦門吏治識其端
曰茲機在我民性豈終頑
冰蘖凜自持晝夜思民艱
政平訟

亦理田里方相安聞君忽遭喪相顧盡悲酸知君行橐
貧相與助清寒君誼一不受徒跣奔計還觀風賢柱史
聞之亦永嘆廉孝苟不彰何以勵庶官千里遙致奠九
原慰親歡茲舉誠異典輿論永不刊士習日趨下砥柱
迴狂瀾願君益修飭白首如紅顏

題教授黃公悅偕弟公本鳳山遐思卷是其先
員外叅藩墓

崑崙鳳凰山上有千年柏誰家卜佳城眠牛雙勝跡有

美黃石公於此藏其魄伊人邈何之奕世瞻載德祥鳥
止其隅啼猿朝復夕悲哉二子心感焉岵與陟

大司空林公歸榮

四序有代謝卷舒惟其時達人戒止足寵祿豈足縻結
髮事明君誓竭股肱為服官歷中外積譽日以馳撫摩
育羣生斬刈平諸夷文武時並用嶺海恬以熙宸衷眷
勞勩平土陟攸司累章不得謝卧家復懇辭壘書重褒
慰庶退乃其宜輿夫并月俸優老恩復滋桑榆延餘暉

山水發幽姿鋤荒步層曲抱杖臨清池泉山諸老翁還
往良無期衣纓傾洛社風流將在茲

山齋文集卷一

欽定四庫全書

山齋文集卷二

明 鄭岳 撰

七言古詩

畫馬行

房星耿耿明碧落神駿墜地走沙漠天閑秣飼列奚官
逸氣俛就青絲絡古來神駿豈易畜遺貌至今動人目
碑兀爭看骨格奇人間萬馬徒多肉汗血染成五色紋

碧蹄高踏秋空雲躩蹠嘶鳴神彩溢此圖疑出曹將軍
渥洼異產今寂寞世無伯樂何由識但收遺骨破千金
不用按圖遠相索

題菜

東風一夜吹霖霖園丁揮鋤土膏沃嘉蔬百種葉抽齊
甕牖寒窺一畦綠朝來擷萁小鐺鳴山館無葷聊餉客
青作寒菹玉糝羹呼酒高歌還鼓腹貴游之子飫羶葷
惜口齶舌咽不得豈知口腹終累人一飯萬錢嗟未足

烹熬珍異傷胃腸山中此味苦無毒君不見志士從來
甘淡泊人間萬事由此作

壬戌九月十八日白湖鎮遇風舟危甚賦此紀

事

時承委南都公事
就送老母還蒲

陽邏下接白湖鎮十里舟行惟一瞬狂飈奄忽自西來
波浪簸空天地震我舟蕩漾載浮沈須臾柁折難復進
百尺巨桅忽中斷舟人惶擾爭奔遁抱扶老母附岸登
雨注泥深風益勁回頭試盼左右舟漂沒中流魚腹殉

白湖巡官忽馳至肩輿羸馬聊借乘前村茅屋漁父家
掃地焚香候門徑問闔老雅訝官至奔走避拜重相慶
細燒楮燹燎衣中炊黍蒸藜頗充饑雨聲浙瀝洒茅簷
目睫不交對餘燼大塊噫氣豈適然兀坐冥搜毛骨振
晏起科頭尚徵咎况乃吾生事多釁操存黯昧鬼先窺
舉錯乖張人或病攬衣晨起當空拜悔悟從今當益慎
春秋紀異不紀祥儆示古今垂大訓

玉泉院對華峰有懷見素大司寇

華峰三面開芙蓉天然秀色浮空中我來坐玩日當午
膚雲忽合雨濛濛南峰隱霧不可見東西峙立鬱葱蒨
懸巖瀑溜垂千條流出亂石如素練結亭據石出林端
極目烟雲渺秦甸雲莊素老性好奇惜未到此一觀之
蒼厓千仞意俱往飄飄拄杖凌空飛象外烟霞諧笑語
風前咳唾成珠璣生平風格狎林藪垂老跼蹐留京師
宿望由來繫朝野屢疏還山未有期使還相見一撫掌
請翁和我華山詩

暮春邀社友遊東山

老至光陰同轉轂今日難將明日卜改歲幾何忽暮春
一夜狂風花漸落東山樵舍巖竇幽十里青山斜帶郭
蒼松偃蹇石峻嶒際海東南盡一目杖屨垂閒試共登
坐聽鳥聲歌伐木蔬盤草草亦易辦糟床夜注酒初漉
家有肥鷄不敢宰巨觥滿引罰頗酷

東巖禱雨題林以永寒谷山水障子

松壇禱雨東巖宿日餐蔬笋斷梁肉我心憚暑慘不舒

獨據蒼崖陰林木寒翁知我厭氛埃為索丹青貽巨幅
披圖細玩思杳然偃蹇雙松翳雲壑中有一叟頽而長
琴書瀟灑從二僕蘄州疏篔疊平蕪短檻高雲聊寓目
綸巾羽扇風飄飄瘦骨清容肖寒谷寒翁寒翁風節奇
結芰紉蘭好奇服歷官中外四十年拂袖歸來書幾簾
豐年妻子尚苦饑况茲亢旱田盡曝稻梁一飽不自謀
猶為蒼生淚盈掬古來賢達類如此杜老秋風賦茅屋
吾社安可無是翁東野雲龍每相逐

東湖書院為吳亞卿獻臣題

大雲山中泉一注東湖先生讀書處先生胸次迥出塵
山中草木皆真趣讀書豈徒事鉛槧匡時事業於茲具
試出緒餘售於人要使蒼生盡陶鑄平生苦節甘若飴
妻子不免於寒饑遇事直前無顧忌終遭坎坷蹈危機
達生委命寧自悔萬里生還天所遺山中茅屋依然在
洞雲江月與心期湖田荒穢方料理詔書南下君復起
百年此道亦何心乘流則行坎則止

和吳約中憲副招飲韻

蚤年仕版濫登名世路艱虞頗獵涉倦遊歸卧故山廬
晝閒殘書時一挾韶光冉冉遞相催坐見春花秋墜葉
近來右臂痛莫堪厚擁綈袍施曲袷故人結社在比鄰
匝月清容纔一接小齋風景自撩人露酒開樽紅映頰
慙慙滿酌泛落英莫遣香風報遊蝶

會盟臺

即秦趙澠池會處

嬴秦日肆虎狼威約趙西來會澠池相如登壇奮怒髮

呵叱秦王如豎兒一時詐力相傾軋睦鄰修好非所宜
夾谷之會何毒蛇汶陽侵田卒見歸長平禍胎從此結
區區擊缶亦徒為會盟有臺今寂寞夕陽蔓草封殘碑

秋水嘆

黃河橫溢縣成渠人家半在水中居水邊漁父持空網
吁嗟無稻復無魚隣居相望隔河汜借貸無從饑欲死
樓船伐鼓晨夜過怒向縣官索夫米

南湖喬木圖詩

永嘉政衰紛酋虜衣冠避亂入南土
滄滌陋習變儒風
邑小曹滕俗鄒魯云誰奮振為之先
南湖諸老抱遺編
結廬弦誦南山下陶冶歐林諸名賢
流風遺澤詎云斬
玉樹芝蘭多異產吾家一脉分
太卿轉徙桃源入蒲坂
坂中族庶衍而昌腴田稔稻充烝嘗
故家門面亦何有
綠繞古樹凡千章先憲當年手自植
老榦差峩蔽天日
冰霜飽嚼節如鎗孫枝秀出皆徑直
畫工描寫入此圖
先輩文字墨未渝篋笥久藏喫蟲鼠
上下殘缺半糊塗

小弟佑生知愛惜緣舊易新重粧飾凌晨捧帚掃家堂
高掛此圖於素壁先人手澤存豈多棄置將奈愚騃何
愆前感此起遐念涕泣更下欲滂沱敬拭下方書數語
此意根心難縷縷吾宗哀替理宜復共振先聲時望汝

賦長生篇壽表兄林孟聲

僊溪之水清且長僊溪山中藥草香何僊尋源昔到此
九鯉變化凌空翔山人昔在穀城住素書不與黃石遇
挈家迤邐來此溪日分甘泉飲一注胃腸經歲忘渴飢

肌膚玉雪顏如鑄更汲溪流煮石髓丹成便爾飛昇去
庭階萸莢紀生年大棗如瓜薦壽筵翩躚鶴馭從空下
霞裾絳節來羣僊從今願祝百千歲眼看滄海復成田
山齋老子時在會酒酣為賦長生篇

杏林春意歌贈方在淵

學書費紙醫費人坡翁此言意苦真脉經素問眼未識
陰陽表裏何由陳匕劑試投違脉理虛詞恐喝驚人耳
俗方幸售責厚酬翦翦逐利活妻子焚券幾人如宋清

偶收寸効浪傳名視癥洗髓自神術三折肱后業始精
方君家世本業儒孔顏讀罷讀靈樞丹溪東垣及仲景
頗窺堂奧濟其腴原病檢方非草草小阮並驅名更早
四方延置不辭勞立起沈疴濟闕天董公種杏昔成林
今無其地有其心一腔生意何曾息起死回生澤物深
峰湖落筆為傳寫幅圖把玩春盈野素翁斫地為長歌
一鄉二妙天所假我生蒲柳質最微年未及邁氣先衰
眼昏足疲齒搖動時借藥力強支持葛巾幸爾謝世局

習靜山中欲辟穀六經糟粕徒勞神枕中鴻寶得奇術
得奇術能駐顏金丹九還火候足君看他日生羽翰

賦五老圖壽戴德洋七十七

黃雲紫水秘壽鄉玄鶴隨人化日長飲水餐英娛晚節
結蟠高會薦清觴五人眉髮皆皓白問其年華不可得
我欲擬之羲皇人羲皇之人無與敵大袖長衫類阮君
羽衣霓裳豈僊客嘗聞潛修阮者流草衣木食輕王侯
修形煉氣老益固朝烟暮霞頻吞吐笑傲泉石脫塵凡

指掌圖書陳列數龜巢蓮葉有餘適鶴舞芝田常自得
孝為安宅友為居敬作章程慈作則我懷汝輩意軒舉
欲借此會憑誰語莫謂五老擅奇芳蒲坂有人還似汝

山齋文集卷二

欽定四庫全書

山齋文集卷三

明 鄭岳 撰

雜體詩

黃河篇

河渾渾發崑崙張騫蔥嶺跡未到虛持漢節尋真源南
流中國見積石雷奔百折趨龍門洑流轉徙浩無垠歷
代為患難具陳武帝之時決瓠子萬乘沈璧躬負新我

浮江漢歷南紀白首始一過益津洪流迅急橫絕波濁
浪洶湧凝心神江漢合流清且駛如何此水混泥滓一
斛水一斗泥臨流不可汲去岸即須犁往年曾決張秋
口萬金纍址成圩堤從此安流循禹跡並岸蒸民盡粒
食方今九五登聖神川嶽百靈俱効職嗟爾河伯謹隄
防侈心莫縱興望洋蛟龍自爾安窟宅平波帖席一葦
航

潼關道

秦山矗矗凌紫烟中分一臂來蜿蜒黃河北走觸山麓
川塗扼束難黃緣高厓壁立通一線疑從甕底窺青天
盤盤磬折開復閉單車隻騎艱迴旋敵樓突起臨雲表
週遭雉堞空中懸惟聞鳥聲遠近相呼應猿猱下上互
攀援乾坤設險有如此我初見之不覺神凜然關中自
古帝王宅成周之世多歷年古稱在德不在險不然秦
傳二世胡為不少延方今萬乘都幽燕西顧雍陝寄旬
宣犬牙相制意故在一關之地中州山陝遙相聯城復

為隍古所戒咨爾守闕將卒母以四方無事長晏眠

苦雨行

我始到關中赤日背流汗仰示高雲馳四郊方憫旱飄
風颯颯吹行輶西來十日雨不休泥潦達途成巨壑洪
濤瀕洞蛟龍浮崖崩石走晝昏瞽莫辨去馬與來牛蕎
麥方花穀垂實漂殘委地紛狼籍農家望望今歲豐頓
足咨嗟向阡陌官租私責何從輸饑寒豈免溝中瘠行
臺獨處愧高崇紛紛決溜如亂淙寢食無聊錯昏晝經

營燥濕移西東何況茅茨與土屋豈禁上雨復旁風崩
摧露處亦何限安得大廈為幘幪豐隆屏翳母太忍下
視九土多疲癯君不見女媧一煉五色石上補天漏全
化功

送徐山人還臨川

會川好奇士遊跡半江湖所在索圖經訪古閱名區南
過庾嶺臨廣海西上端溪弔蒼梧五羊仙人不易遇擔
簦遙向閩中住木蘭水濶壺山高竹杖芒鞋入煙霧指

點羣峰海上來，蜿蜒真龍泊何處。
蒲中豪彥多與遊，沿洄曲澗歷高丘。
流光荏苒客鬢改，歸思飄飄竟莫留。
念予洪都一日故，屢枉敝廬攄情愔。
柳絲歷亂杜鵑啼，相送城南白日暮。
黃花白酒霜鴈鳴，望君更踏來時路。

山齋文集卷三

欽定四庫全書

山齋文集卷四

明 鄭岳 撰

五言律詩

泰陵望引哀歌

山陵功已奏儀衛出都城萬姓驚相弔千官泣從行雲
寒移羽葆風慘雜金鉦天道憑誰問人方倚太平

其二

統極乾坤正垂衣十八年雷霆威不失日月照無偏玉
几傳遺訓烏號哭御筵中興還有頌千載播瑤編

其三

孝道追虞舜寬仁過漢文屢蠲天下賦深却四夷勲郊
廟精裡格宮闈問寢勤大臣時賜對左右不曾聞

其四

十載沾微祿君恩大造同迂狂曾有疏奔走竟無功遺
詔江湖外行舟雨雪中傷心違執紼涕淚洒悲風

曲江鴈塔

曲江斷流水鴈塔突層空
一代豪華地千秋悵望中
荒階晴積蘚陰洞晝生風
俯仰無窮事青冥一斷鴻

吳門即景

短棹下吳門連朝雨色昏
青山斜帶郭碧水曲通村
香稻秋將熟幽花晚更繁
歸途無限意惆悵與誰論

送徐用勵侍御赴京

深春辭故國積雨滯行裝
草色渡頭滿江流天際長
花

明迎繡斧鳥過避封囊樽酒情無盡雲山故故蒼

奉侯林見素都憲平蜀寇致仕三首

洪都通驛使廬阜候仙舟一水遙相望羣山獨對愁交
情憐白首歸興憶滄洲身退功成日川江正急流

國步艱難日天書趣赴時金牛新戰壘白帝舊城池羽
檄申嚴令鏡歌雜雅詞乖崖留像處聊慰蜀人思

幕府功頻上騷壇興每登江搖青嶂影樹入碧雲層陣
法依諸葛詩篇出少陵蒼崖看墨蹟長憶漢中丞

武功阻雨呈康德涵狀元三首

雍原臨古邑信宿雨淹留樹色沈官舍溪聲傍驛樓懶
吟翻舊稿暝坐擁重裘嘉客能相過開樽一散憂
雨色終朝暝空堂望眼孤詩篇傳候吏雞黍戒行廚慷
慨談時事迂踈愧腐儒修翰飛不盡萬里睇雲衢
關輔多英俊掄魁迥不凡清樽延款語細雨濕征衫絕
粒離烟火行空脫轡銜西歸仍有約拉我訪雲巖

過同年胡伯鍾家留題

別離經十載今雨到君家村徑斜穿竹江流曲擁沙魚
肥翻細網覓美摘新芽契濶談無盡宵殘更煮茶

題陳山人所居

山居成小聚野戍襟耕屯雞犬時登屋軒車少過門高
春含暮景芳樹漏春痕風物居然別桃源何處村

江行即事二首

閩江江水惡一歲九經過近午霧方散中流石更多漁
樵荒蕩路豺虎據深窩最念沿江戍天寒獨枕戈

荏苒歲云暮天涯臘月初
夢中鄉路遠病裏鬢毛疎
水落灘逾險瘴深草未除
獨憐梅樹發偏近野人居

分司夜坐

急雨鳴空過疏星綴月生
露含庭草潤涼入葛衣輕
落魄平生念悲歌此夜情
南歸定何日寇盜未銷兵

春夜不寐

耿耿意何如疎燈四壁虛
風波淹異域花竹憶吾廬
雨洒殘更斷寒消積雪餘
悠然忘世念一枕到華胥

宿蒜嶺驛書懷二首

信宿人還去乾坤此驛亭
皇華隨處轉義馭為誰停
鳥帶林光夕雲含海氣腥
南歸猶倥傯何日謝山靈
冠冕慚吾分勞生亦此官
皇圖多遠畧世路乏清歡
毒霧迷閩嶺驚雷下建灘
經過雖已慣猶遣壯心寒

送柯奇純疏病南還

李泌名方起休文病轉縈
望鄉愁思減去國宦情輕
江淨孤帆影天寒落葉聲
烏山深築室坐養寸丹成

送啓範進士北上

超悟年何早，吾宗幸有人。
高文自機杼，厲志任酸辛。
雲散長亭雨，冰消上國春。
九達看逸足，騰踏出風塵。

月峰寺次見素韻送陳惟濬正郎時謫戍過此
溪聲寒瀟瀟，峰影晝沈沈。
落日孤臣淚，踈砧故國心。
江村竹葉酒，野寺木綿衾。
邂逅緣非偶，山川幸一臨。

送洪商臣出鎮水寨

年少多英畧，提兵羨此行。
柁樓明海色，鼙鼓震邊聲。
浪

沒鯨鯢窟雲閒鳥隼旌梅峰清夜月應照水西營

楚城端午弔古

屈子力扶楚懷王悞信秦浴蘭傳舊俗包黍薦明神奇
字終投閣諛文獨美新反騷空有賦千古愧纍臣

客路

客路經行處今還識舊津短篷懸暮雨斷鴈沒秋旻草
土六年夢乾坤一罪人麥舟懷往事惆悵淚沾巾

野望

病告捐微祿官閒帶舊銜提攜惟藥裹懶慢廢書緘海
濶浮孤嶼天空掛一帆吟眸隨處著秋色滿衣衫

硤石阻雨

積雨滯行裝山坳坐驛堂危岡迴馬首細路遶羊腸躡
磴防泥滑添衣覺晝涼客懷正寥落重感鬢毛蒼

雨不絕

薄晚看晴色中宵復雨聲疎鐘京國夢孤燭異鄉情岐
邑勞供應關山斷送迎行藏信天道不必問陰晴

新嶺望壺山

凌晨登絕嶺遙見八壺青
屹立撐霄漢盤迴障溟為
誰還作怪笑我亦鍾靈精
舍依深麓相期在暮齡

朱晦翁自

新嶺望壺公嘆曰莆許
多人物此老作怪也

古溪亭為盧師陳進士題

晶晶湖光淨分流到石莊
鳥歸山色暝風度雨聲涼
秋水芙蓉汗烟蘿華子岡
小詩供日課幽興一何長

送王應時奉使南還二首

奉使非君職，淒然念死生。
旅魂迷舊國，婺室寄孤城。
梅雨南天迥，星河北極明。
筆峰休戀住，預計簡書程。
觸暑臨官道，含情對別樽。
吟懷緣病減，旅思及秋繁。
負郭一犁少，遺孤滿眼存。
知君心力盡，人紀古來敦。

題林汝桓戶曹夢槎奇遊卷

地盡南溟杳，雲橫北闕深。
敢為浮海嘆，共識濟川心。
渴飲萊公井，閒聽單父琴。
扶桑看曉日，直上閩風岑。

竹莊為丁揮使繼卿題

煙雨湛寒碧山莊趣更幽將軍日無事步履一來遊萬壑生虛籟三湘接素秋物華轉銷歇歲晏為君留

過沛縣

破屋浮波面輕帆繫樹腰歌風何慷慨擊筑竟蕭條故里英雄戀荒臺霜氣銷向來湯沐地無處問漁樵

別豫章

時物新驚眼幽居已隔年化離當盛暑汗漫越長川送客飛江燕移家上楚船西山多秀色相望獨依然

陽朔書事二首

山城纔半里面面有奇峰虛峒生雲氣清江瀉石淙行
臺榭訟牒野戍肅軍容農畝收新稻時聞雲外春
一水鳴環遶羣峰列戟圍秋高風動響庭靜月流輝客
夢悲離合宦途有是非桑榆景將暮游子未能歸

冒雨至太平驛

陰晴曉未分驅馬出驛門野濶雷聲殷雲低水氣昏旅
遊今日味風雨幾家村候吏逢鄉舊慙慙勸酒樽

送顧憲副朝京

萬里還闕客題詩復送行秋聲聞落葉鴈影度寒城天
表瞻依近臺端舉刺明吳門來往路兼慰故鄉情

別王顯忠還莆

舊族餘風韻辛勤守一經勞生頭共白訪舊眼仍青積
雨浮江閣輕鷗落晚汀倦遊將解組先我慰山靈

阻雨鳳翔官舍詠竹二首

霖潦浮堦漲篔簹滿院陰風高秋瑟瑟城迥晝沈沈一

徑穿苔破孤亭積翠深
霜臺移種晚聊閱歲寒心
秋暮雨淒淒開軒萬竹齊
震雷驚笋迸積霧壓枝低
嶰谷伶倫杳湘江帝子迷
岐山回首近還待鳳凰棲

清水道中

百里關山隔千林氣候分
霜華飛冉冉木葉墜紛紛
日照雲根濕溪迴草氣芬
澗泉流細響雨過更堪聞

棘寺後軒芍藥盛開邀諸同寅小酌

棘臺當晝永藥圃過春殘
對客偶多興憑軒一試看
蛾

眉分黛綠鶴頂妬瓊丹開落年年事芳根閱歲寒

通州道中奉東費湖東石熊峰賈南塢三閣老
出畫經三宿吾行未厭遲羣公期出祖滿卷重貽詩天
地開晴旭山川耀遠姿去途淨如洗塵土豈容緇

雨中憶華山

昨日觀西岳奇峰面面環境幽將獨往興盡更遲還雨
色冥濛外鐘聲杳靄間使歸仍過此直欲步孱顏

野宿

浹旬長苦雨今夕月生光影動晴峰雪寒凝碧瓦霜盤
飡羅野蕨雞犬靜村莊重引還山興題詩寄草堂

見冰

野次凌晨發前旌阻亂灘峰巖度隴峻氣候近邊寒澗
淺冰先結泥深凍未乾北歸愁雨雪迢遞望長安

北壇夜坐

出郭謝塵鞅幽虛復此軒神清渾少睡心遠不聞喧樹
影寒欺燭蛩聲暗到門晨朝助明薦端坐欲忘言

春日泛舟木蘭二首

南郭曉初霽維舟曲岸傍
踏青林莽淨修禊水雲長
汀霧晴猶濕潭花落更香
木蘭知不遠漁唱隔滄浪

蘿徑登溪閣憑虛一嘯吟
鳥聲林屋迥樹色石壇深
春晚催農事人間養道心
絕勝風雪夜迢遞訪山陰

同遊
蔡希

淵郡博山
陰人故云

西洲偶成

瓜圃秋延蔓粳田晚種苗
三農逢稔歲一飯答清朝
野

曠炎威散人閒世慮消受塵吾計定不待小山招

黃伯固起大理寺丞得枯株類石愛而藏之戲

題

自分委溝壑歲深始一遭主人愛奇古此物出林皋斑
剝深紋斷峻嶒老氣豪坐看長芝菌生意未蕭騷

湘源別妹婿陳德昭還莆

旅館年光暮殊方意緒長東裝辭五嶺並棹下三湘殘
雪分歧路飛雲認故鄉三年廢甘旨為我慰慈堂

宿石泉寺修先墓感懷二首

石泉舊名寺廢墜亦堪哀
巖桂春開落溪雲日去來
基荒選佛閣草沒雨花臺
世界歸空寂乾坤幾劫灰
曲澗依高坂荒墟帶遠林
封培六世壠跋涉兩山岑
湖海多年夢松楸此日心
昊天何可極老淚洒衣襟

送陳生南還

榆柳散輕烟春風又別筵
帝鄉逢故侶客思入新年
鏡裏冰霜色囊中錦繡篇
小西湖上月相望幾回圓

次前韻送陳山人還莆

素紙落雲烟書名動四筵卜居元共巷別路已經年
逸少籠鷺興公孫舞劍篇古碑隨處見筆意更清圓

吳門卧病承同年王敬止枉顧

藥餌扶餘病江山負賞心閉門憐獨卧枉駕遇知音
澤國鴈聲早吳門秋色深稍須精力健同上虎丘岑

嘉興遇同年胡靜庵亞卿夜話

我即南歸路君當北上時方舟侵夜話聚首積年期
兵

合少山人卷四
柄難操切宦途多嶮巇平生重節槩出處復奚疑

重陽日經車盤驛

迢遞車盤道閩關望不賒四年憐作客萬里喜還家樹
隱山含霧溪明水印沙重陽風日好一任葛巾斜

淇縣道中

一雨炎歊淨輕陰匝柳堤津亭流亂水轍跡陷深泥餘
潤寧翻井荒原盡舉犂農家休嘆晚猶及餉蒸藜

秋夜感懷寄邵二泉宗伯二首

悄悄空庭暮啼鳥集子城疎燈懸夜雨落葉散秋聲
跡元無累憂時獨繫情何當逢北使款語及昇平
天道開皇極人心望太平八蠻俱入貢四海且休兵
獻納多英俊謀謨足老成何當變新局快意較輸贏

乙酉除夜二首

荏苒歲云暮悠悠此夕除城闌人語寂燈火夜堂虛
娛老樽餘醪詒謀架有書春來身尚健綠野課耕鋤

去國歸輿論還家值歲和高談成獲落宿計任蹉跎
椒

葉熏人醉梅花照鬢睛
奚囊檢詩課較與去年多

擬古何處難忘酒二首

何處難忘酒春風欲暮時
蟲魚荒素業鍾鼎負前期
白社風烟古滄洲藥草滋
此時無一盞奚以慰支離
何處難忘酒間關世路難
虛名慚海內孤跡滯江干
燕避重簾遠花經宿雨殘
此時無一盞寂寞對誰看

挽王廷玉乃父

嘗經土木之難

豈無死綏志慟哭向陰山
失險六師破冒圍一士還儀

床衣尚赤墓道草空斑邊覺何人啟忠魂繞漢關

挽王存敬郡公

海內名流少嗟公又夢楹飄零千里道慟哭萬家城山
谷留詩句乖厓足治聲棠梨花發處南國有遺情

挽故守潘公舜絃

別郡初傳計因風遠寄悲檢田民不擾判案吏難欺叔
度來時頌何公去後思千年輿論定名宦列高祠

西郭經故友陳如賓墓二首

德音猶在耳洒泣忽經春川嶽收光氣冰霜老素臣手
營墳域近祀託族枝親物論從前定乾坤只一真

考亭遺道脉落落竟誰扶獨立凌千古清風振八區聖
心憐最苦時論病猶迂俯仰懷知己空山一束芻

李大理仲陽邀遊白水塘夜宿泛波樓有作

開軒臨北渚見月上東溟爽氣生衣袂清光溢戶庭映
空塘水白隔岸海峰青夜靜微波起浮槎犯斗星

答林侍御時獻招飲流泉

開荒臨野浦，結屋俯流泉。
地僻何曾俗，人閒即是仙。
銀絲魚膾美，錦籜笋芽鮮。
雨後添新綠，前溪可放船。

晚秋社會溪閣二首

溪閣重遊地，秋光欲盡時。
石崖懸瘦影，巖桂媚幽姿。
野濶雲俱斂，波深鳥獨知。
黃家有盆樹，向晚看尤奇。

勝遊成屢約，俗事苦相妨。
疊石橫沙渚，清溪進野航。
稻香仍候雨，木落始知霜。
節物時時變，難禁鬢髮蒼。

約遊次林都憲孚可韻

雨深花落盡泥濕燕來新拙性多違物餘年早乞身勝
遊懷獨往俗事苦相因在處存調變微斟竹葉春

秋日邀社友泛舟

逸老成嘉會今來又一週寒聲催落葉月色近中秋感
物時應變勞生事已休滄浪歌鼓棹天地一虛舟

暮春社會東山樵舍

樵舍東山近僧巖北郭深多時成契濶晦日試登臨春
暮花爭發林深鳥一吟塵寰應迥隔聊共滌煩襟

宿弘慈寺

暝色下城闈，禪關隔素塵。
竹枯含舊凍，梅放漏先春。
臧否從時論，行藏識古人。
羈棲猶未定，瞑坐養吾真。

誕日謁先考妣墓

九我恩難報，悽然感誕辰。
松楸今日淚，天地此生身。
壯志消蓬矢，休祥負紱麟。
一杯酹黃土，肝鬢不無神。

榕臺

過眉方竹杖，扶醉上榕臺。
萬木橫空繞，羣峰到海迴。
桑

麻懷栗里笙鶴隱蓬萊結社誰同調白蓮花正開

避暑梅莊

門巷埋深轍軒楹俯淺山百年餘此日萬事近哀顏漆
室空憂世鹿門獨閉闕物情各有適日暮鳥飛還

春日梅隴書事

步履仍扶杖拋書獨凭闌凝烟迷野望積雨釀春寒
步隴抽新綠花枝綴渥丹韶華不覺換猶作去年看

蒲坂構祠書事

故里心長繫新祠喜落成好山當面立流水入懷清文
獻開先裔公侯復始情哀年頭重白力盡此經營

夜宿月峰蘭若

道心常自適塵界詎能迷榆景偶多暇禪林時一棲鐘
聲風斷續樹影月高低萬有皆虛寂晴窓聞曉雞

首春邀鄰曲二三友遊梅隴兼卜新兆曠然有
懷二首

小丘聊試卜高下屢移籌造物藏深巧人生圖永休決

渠分麥隴趁雨種松楸雞黍堪供客無妨信宿留
歲華驚忽改草構喜新成鄰舍舊儔侶吾家老弟兄登
臨尋宿約歡笑慰平生明日歸城市悠悠無限情

春日山中雜詠三首

避俗尋幽壑度閒課小詩城中消息斷林下起居遲農
事鄰翁話機心野鶴知峰頭雲忽變薄暮雨來時

一春常苦旱入夏望猶慳薄午雷方震通宵雨未闌溪
流分遠碧草色變新斑田父驅牛出簷鳩喚婦還

歲儉人方困春深力未齊
平洋初插蒔高隴欲翻犁
雨色連村暗簷聲入戶低
豐年茲可卜滿意是山栖

夏日梅隴雜咏二首

樹雜常遮日牆低不礙風
高眠三伏靜宴坐一塵空
齒豁仍愁痛鬢踈更覺蓬
渭濱老漁釣無意夢非熊
地曠無拘礙林虛轉寂寥
蛛絲懸近戶鳥語隱深條
多病依農畝餘生荷聖朝
獨慚無厚德閒福恐難消

舟夜二首

寂歷江村暮歸舟歎乃歌千峰含宿靄一水漾清波揮
燭驅蚊去鈎簾待月過老夫興不淺端坐夜如何

日斂江光暝風寒水氣涼舟帆低著岸月色近臨牀感
慨仍多事棲遲自一鄉古今徒俯仰兩鬢已成蒼

曉發建溪

夜雨添新漲傍舟與岬齊漫灘浮亂石疊嶂夾危溪夷
險心無累行藏道豈迷故園覺清曠更好結幽棲

八月二十四日雨雪二首

門徑絕行蹤
晨雞復暮鐘
斷橋深阻客
積潦久妨農
陰結三秋雪
寒生八月冬
茫茫真宰意
欲問苦無從

仲秋交雨雪
父老道前無
粟穗登場少
麥花觸凍枯
乾坤存變理
民物重艱虞
昨夜傳飛檄
河西更戒塗

馬嵬

割愛苦不早
臨危奈若何
聞鈴斜谷道
埋玉馬嵬坡
寶靨銷殘粉
霓裳失舊歌
千年亡國地
惆悵一經過

華州郭汾陽故里

汾陽舊居里乃在華山阿列岫疑分壘攢峰類偃戈孤
忠扶日月百戰莫闕河善處功名際萋斐奈爾何

秦州

成周仍祀益非子始封秦列國輿圖盡西戎霸業新山
川猶故國宇宙一浮塵杜老僑居處詩篇尚有神

天津紀勝

萬國舟航會諸河渤海通星躔環極北兵衛控京東人
逐魚鹽利天開形勢雄時平仍設戒永不動戈戎

九鯉湖

擁被宿雲館神清夢亦安
水聲喧夜雨山氣挾春寒
簷箔明星度溪薜白露團
神仙隱名姓厓上不須鑿

林見素出殯感傷二首

雲莊還舊隱壽水復新阡
宅兆青山改精靈白日懸
乾坤收正氣朝野失名賢
身後無遺表恩波隔九泉

公沒未蒙

卹典故云

喬嶽頽鄉望悲風動士林
三孤酬晚遇再疏遂初心
歸

金少曰八月十一
卷四
老同投笏論文每盍簪追思麗澤處執紼淚沾襟

陳石峰出殯感傷

輻車垂素幙欲發故遲遲雨濕銘旌冷風寒鼓角悲青
丘成永別白首失相知物論從前定無慚郭泰碑

方松厓出殯感傷

六桂傳芳韻二難振羽儀平生多節槩吾道有光輝十
里佳城在三生舊話非客途曾夢我迢遞勸君歸

公在衡州

嘗夢予言曰松厓只合歸休公曰何待公言因是歸志益決得正首丘云

和汝儀招遊溪閣韻

溪舫臨門繫茆堂背閣開歲從忙裏過春向老邊來巖
韻賡新句醇醪酌淺杯烟光延夕景留興未能回

次翠庭折柬招飲韻

泥雨愁方困緘書喜見招亭臺荒積蘚松桂發新條有
酒須傾倒無詩恐寂寥慙懃催早赴語僕戒晨朝

贈楊子豐尹河源

理郡名猶在移官事頗奇人生應有分世路亦多歧素

節看逾壯丹衷諒不移羅浮高倚劍越井淨流巖

題林希虞別駕亭子二首

牢落辭名郡棲遲返故山興垂青野迥心與白雲閒
笳屋清溪曲鳳毛碧漢間更期燭火候坐見大丹還
臨流閒自適寤往未為遲門靜雲深鎖天空鳥獨知衣
巾還古調歌咏樂清時隔水鄰莊近相過不用期

韓忠獻公祠

遺像三間屋庭荒碧草春千年人血食一代宋名臣碑

古字多缺神幽祀屢新獨憐南渡後苗裔竟誰親

曹氏園亭阻雨雜詠


地僻人蹤斷亭幽鶴夢長
繁花交短徑瘦竹倚巍牆
信宿情猶戀平生意敢忘
辛勤三十載無計辦山莊

過伏城驛

驛舍通幽處紛披花滿畦
皇華多駐節素壁盡留題
暫爾開塵眼終然愛野棲
僕夫促前路去去意還迷

題狎野亭

黃石烟霞處桑麻十畝多亭前環藥圃榻外即雲坡
雨耕僮出尋春訪客過主人無俗慮浩浩只長歌



山齋文集卷四

欽定四庫全書

集部

山齋文集卷

五至九

詳校官監察御史臣龔駿文

中書臣劉源溥覆勘

總校官知縣臣楊懋珩

校對官助教臣卜維吉

謄錄監生臣金特

欽定四庫全書

山齋文集卷五

明 鄭岳 撰

五言排律

送閩都憲歸朝十二韻

江漢上游地安危寄重臣
公來惟鎮靜公去共悲辛
法網收元惡恩波及細民
扶函頻問俗開閣每延賓
卷爾三苗裔囂然七澤濱
奉辭平窟穴奏凱動坤垠
左轄官

資轉薦恩驛名新春江晴漾楚烟樹眇連秦憂國心長
赤歸朝鬢未銀中臺持憲度清采肅簪紳霄漢瞻依近
江湖夢寐頻因風深祝願早晚畫麒麟

壽楊遠菴閣老七十

黃閣解機柄青山娛歲時君王曾幸處草木自恩私存
問勤中使名聲播遠夷鄭均仍賜祿裴相重貽資禮樂
河汾教丹青洛社儀平章年九十潞國有前期

壽喬白巖太宰六十

聖代中興日蒼生望治辰洛龜方啟禹嵩嶽復生申魚
水君臣會乾坤雨露新百寮資楷範四海望衡鈞峻秩
登黃閣清光切紫宸冠裳成雅集庚甲度初巡禁裏春
如海朝端鬢未銀願天終祐國永錫老成人

贈方文玉左轄南還

榜下人還幾天涯意倍親因君謝塵鞅復此嘆參辰戎
務時叅畫軍興屢算緡江湖平劇寇越雋拊罷民祿秩
承三錫封章見屢陳官箴恒檢束勢路獨逡巡盡瘁年

逾邁圖歸願始伸
客途方雨雪故國尚松筠
潮汐門通海清輝
月近隣山僧遺紫筍
漁父薦纖鱗
觸事情俱適
無為俗轉淳
穀齋諸老在
結社繼前人

冬至上陵經回龍觀

初秋嘗過此冬半復重來
景物經時別年光轉眼催
閒庭聊駐馬勝地且銜盃
觀閣烟霄接簷楹斗柄迴
瓊枝晴帶雪井幹晝聞雷
鶴化多年去龍游幾日回
橋山神御路玄圃帝城隈
翠栢寒逾勁清泉凍復開
卿雲占象

闕陽管候葭灰煖色輿臺喜明裡薄劣陪褰幘舒遠望
青嶂晚崔嵬

過嚴陵釣臺

漢室中興日賢人願仕時先生獨不屈此意竟誰窺文
叔差增舊君房亦素癡謀謨先已定仁義此奚施即欲
助為理尤宜自得師詔書勤往訪諫議處仍卑志士寧
相逼高賢不受羈羊裘終隱去魚釣可忘饑炎祚噓重
燭桐江繫一絲雲臺俱泯沒嚴瀨自清漪遺廟松株古

蒼崖壁立危扁舟歸老容悵望讀殘碑

同年惠從道憲副邀遊西湖紀興十三韻

十年懷夙約及此泛西湖雲斂雨方霽秋深暑却徂躋
攀緣寶塔臨眺盡輿圖樹色迷城邑潮聲振海隅累朝
香火寺前代帝王都畫舫平臨岸青山近入厨波心靜
容與水際轉縈紆新廟虔妥岳長堤尚姓蘇精忠垂異
典遺愛繫名區力戰越稱霸偏安宋避胡江山耽富麗
士女競歡娛吳會憂難據中原望已孤車書今混一南

北此通途

望終南山

行臺臨渭水，隱几對終南。
面勢殊軒豁，晴光更蔚藍。
憑高窮隴蜀，設險帶崑函。
異產饒金石，明堂具櫝楠。
韓詩嘗競態，邊徑獨貽慙。
累代皇圖改，明時聖澤覃。
霜華羣物肅，秋氣萬峰含。
獨往情何劇，端居意每貪。
烟塵凝遠眺，巖谷阻幽探。
擬逐仙人住，還從石丈叅。
山靈遥謝客，蕙徑請回驂。

華山

華山之勝名天下而遊者鮮陟其巔太宰喬
白巖嘗登焉予行時辱以簪萍錄見示中有
登華山賦讀之飄飄然若欲凌虛而上也顧
力疲興淺使事有程不能遠追遐躅僅一至
山下瞻眺而已詩以志愧凡二十韻

五嶽俱名鎮無如秦華雄崑崙分一脉迤邐障關東峰
勢連西極河流徑北戎蜿蜒蟠厚地兀突倚層穹日月

從升降乾坤並始終四時殊景象一氣混鴻濛秀結陰
陽會竒成造化功虛明凌鴈宕縹緲出崆峒青壁疑無
路瑤華別有宮雲梯聯斷塹鐵鎖下虛空玉井人誰到
雲臺興未窮澗幽泉蕩滴徑合草蒙茸野客憐衰白塵
蹤厭軟紅顧瞻徒耿耿佇結更匆匆名字曾先兆精誠
或暗通高崖愁削跡孤翥欲凌風獨往知何日神遊在
夢中昌黎曾失路京兆為開蒙意適聊須遣詩成不待
工登高仍有賦深愧白巖翁

贈崔都閫移鎮廣東

驛騎傳新報，除書出尚方。
嶺南移節近，薊北望京長。
蜃氣浮城櫓，霜花拂劍鋌。
閫嚴施畫戟，權重握銀章。
寇壘逃官責，軍功冒戰場。
豈能窮窟穴，徒爾費芻糧。
犢終銷盜留，田足破羗從。
來邊徼地，籌畧在兵防。

山齋文集卷五